

წესდება დამტკიცებულია  
სეოკ-ის სესიის მიერ  
2010 წლის 27 დეკემბერს  
საერთაშორისო ოლიმპიური  
კომიტეტის შენიშვნებისა და  
რეკომენდაციების, სეოკ-ის  
2008 წლის 31 ოქტომბრის  
სესიის შემდეგ სეოკ-ში  
შემოსული წინადადებების  
შესაბამისად

განხილულია  
საქართველოს ეროვნული ოლიმპიური  
კომიტეტის  
2008 წლის 31 ოქტომბრის  
სესიის (საერთო კრების) მიერ

საქართველოს ეროვნული ოლიმპიური კომიტეტის (სეოკ-ი) - კავშირის

### **წესდება** (ახალი რედაქცია)

#### **პრეამბულა**

თბილისში, ჭადრაკის სასახლეში 1989 წლის 6 ოქტომბერს გამართულ კონფერენციაზე დაფუძნდა საქართველოს ეროვნული ოლიმპიური კომიტეტი (სეოკ-ი). დამფუძნებელთა კრებამ დაამტკიცა წესდება და დეკლარაციის ტექსტი. პრეზიდენტად არჩეულ იქნა ნონა გაფრინდაშვილი.

1993 წლის 23 სექტემბერს მონაკოში გამართულ საერთაშორისო ოლიმპიური კომიტეტის 99-ე სესიამ სეოკ-ი სრულუფლებიან წევრად მიიღო.

წინამდებარე წესდება წარმოადგენს სეოკ-ის 2005 წლის 16 დეკემბერს დამტკიცებული წესდების ახალ რედაქციას, რომელიც მოყვანილია სეოკ-ის ქარტიის (2007 წლის 7 ივლისის რედაქციით) სრულ შესაბამისობაში.

საქართველოს ეროვნული ოლიმპიური კომიტეტის (სეოკ-ი) - კავშირის

## წესდება

### I. ზოგადი დებულებანი

საქართველოს ეროვნული ოლიმპიური კომიტეტი-კავშირი (შემდგომში სეოკ-ი) ნებაყოფლობითი საზოგადოებრივი ორგანიზაციაა, რომელიც მოქმედებს ვადის განუსაზღვრელად და მოწოდებულია ხელი შეუწყოს ოლიმპიური მოძრაობისა და სპორტის განვითარებას საქართველოში.

სეოკ-ი თავის საქმიანობას წარმართავს საქართველოს კონსტიტუციის, საქართველოში მოქმედი კანონმდებლობის, საერთაშორისო სამართლის ნორმების, ოლიმპიური ქარტიის, სპორტის საერთაშორისო ფედერაციებისა (სსფ) და ამ წესდების საფუძველზე მჭიდროდ თანამშრომლობს სოკ-თან (IOC), მსოფლიო ეროვნულ ოლიმპიურ კომიტეტთა ასოციაციასთან (ANOC) და ევროპის ოლიმპიურ კომიტეტებთან (EOC).

საქართველოს ეროვნული ოლიმპიური მოძრაობა საერთაშორისო ოლიმპიური მოძრაობის შემადგენელი ნაწილია და კისრულობს პასუხისმგებლობას ოლიმპიური ქარტიისა და ოლიმპიური მოძრაობის დებულებათა დასაცავად და საერთაშორისო ოლიმპიური კომიტეტის მიერ მიღებული გადაწყვეტილებების განსახორციელებლად.

ეროვნულ დონეზე ეოკ-ის მისიისა და როლის გათვალისწინებით, სეოკ-ი აქტიურად მონაწილეობს მშვიდობის პროპაგანდაში, სპორტში ქალთა მასობრივი გაერთიანების ხელშემწყობ ინიციატივებში, სპორტული ეთიკის დაცვასა და განმტკიცებაში, მსოფლიო ანტიდოპინგური კოდექსის მოთხოვნათა დამტკიცებასა და განხორციელებაში, ებრძვის რასიზმის ყოველგვარ გამოვლენას და სათანადო ყურადღებას უთმობს გარემოს დაცვის საკითხებს.

სეოკ-ი აღიარებს საერთაშორისო ოლიმპიური კომიტეტის (სოკ-ის) უმაღლეს ხელისუფლებას და ოლიმპიური ქარტიის უზენაესობას.

სეოკ-ის უფლებამოსილება ვრცელდება საქართველოს მთელს ტერიტორიაზე და თავისი მიზნებიდან გამომდინარე მოქმედებს როგორც ქვეყანაში, ასევე მის ფარგლებს გარეთ.

სეოკ-ს აქვს თავისი სიმბოლოები (დროშა, ემბლემა, ვიშკელი, სამკერდე ნიშანი, ჰიმნი), მრგვალი ბეჭედი, დამოუკიდებელი ბალანსი, ქონება, საანგარიშსწორებო საბანკო ანგარიშები როგორც ეროვნულ, ასევე უცხოურ ვალუტაში.

სეოკ-ი დამოუკიდებელია სახელმწიფო ხელისუფლების, ადგილობრივი მმართველობისა და თვითმმართველობის ორგანოების, პოლიტიკური პარტიებისა და საზოგადოებრივი ორგანიზაციებისგან და თანამშრომლობს მათთან ხელშეკრულების საფუძველზე.

სეოკ-ი უფლებამოსილია:

- საკუთარი სახელით შეიძინოს ქონებრივი და არაქონებრივი უფლებები, დადოს ხელშეკრულებები, კანონით დადგენილი წესით დააფუძნოს ორგანიზაციები, ფილიალები (წარმომადგენლობები) როგორც საქართველოში, ასევე მის ფარგლებს გარეთ, ფლობდეს, სარგებლობდეს და განკარგავდეს მის აქტივებს საქართველოს კანონმდებლობისა და მიზნების შესაბამისად, იყოს მოსარჩლე და მოპასუხე სასამართლოსა და არბიტრაჟში.
- დადგენილი წესის მიხედვით საქართველოს მთელს ტერიტორიაზე ან საზღვარგარეთ შეასრულოს ყოველგვარი სახის გარიგება, მათ შორის საგარეო ვაჭრობის და სხვა იურიდიული აქტები საქართველოს და

უცხოეთის გაერთიანებებთან, საწარმოებთან, ორგანიზაციებთან და ფირმებთან.

- შექმნას საწარმოები, დაწესებულებები, კომერციული ორგანიზაციები, მოიზიდოს ინვესტიციები, მათ შორის უცხოური, რომლებიც ხელს შეუწყობენ სეოკ-ის მიზნების, ამოცანების და უფლებების განხორციელებას.
- მოაწყოს ლატარიები, აუქციონები, კულტურული, სპორტული და სხვა ღონისძიებები. სეოკ-ის ექსკლუზიური უფლებაა განახორციელოს სარეკლამო და სპონსორული საქმიანობა საქართველოს ოლიმპიურ ნაკრებ გუნდზე, საქართველოს ოლიმპიურ დელეგაციებზე და მათ ცალკეულ წევრებზე, ტექსტებითა და გამოსახულებებით უზრუნველყოს სარეკლამო საქმიანობის ფორმირება და გამოყენება რეკლამის სახით.

ოლიმპიური ქარტიის წესების თანახმად და ამ წესდების XII პარაგრაფის მიხედვით, სეოკ-ს შეუძლია საქართველოს ტერიტორიაზე გამოიყენოს ოლიმპიური ემბლემა, სიმბოლო, დროშა, დევიზი და დასახელება (“ოლიმპიური“, “ოლიმპი“ და სხვ.).

სეოკ-ს უფლება აქვს ყველა იმ ღონისძიების სარეკლამო უფლებაზე, ტელევიზიის ჩათვლით, რომელიც სეოკ-ის მიერ ან მისი ეგიდით ტარდება საქართველოს ტერიტორიაზე.

სეოკ-ის იურიდიული მისამართია: ქ.თბილისი 0171. დოლიძის ქ. №2.  
 ტელ: +(995 32) 36 57 22  
 ფაქსი: +(995 32 36 57 21  
 ელ.ფოსტა: [geonoc@access.sanet.ge](mailto:geonoc@access.sanet.ge)

### II. სეოკ-ის მისია და როლი

1. სეოკ-ის მისიაა ოლიმპიური ქარტიის შესაბამისად უზრუნველყოს საქართველოში ოლიმპიური მოძრაობის განვითარება, ხელშეწყობა და დაცვა.
2. სეოკ-ის როლია:
  - 2.1. საქართველოში სპორტისა და განათლების სფეროში ოლიმპიური საგანმანათლებლო პროგრამების ხელშეწყობის გზით, ყველა დონეზე - სკოლებში, ინსტიტუტებსა და უნივერსიტეტებში ოლიმპიზმის ფუძემდებლური პრინციპებისა და ფასეულობების პროპაგანდა. აგრეთვე ისეთი დაწესებულებების შექმნის ხელშეწყობა, რომელთა მიზანია ოლიმპიური განათლება - ეროვნული ოლიმპიური აკადემია, ოლიმპიური მუზეუმი და ოლიმპიურ მოძრაობასთან დაკავშირებული სხვა (მათ შორის კულტურული) პროგრამები;
  - 2.2. სეოკ-ი ყოველმხრივ უწყობს ხელს ქვეყანაში მაღალი სპორტული მიღწევების წარმოჩენას, მოსახლეობის მასობრივ ჩაბმას მოძრაობაში “სპორტი ყველასათვის“ და შეაქვს თავისი წვლილი სპორტული კადრების მომზადებაში;
  - 2.3. სეოკ-ის განსაკუთრებული ფუნქციაა ქვეყანაში ოლიმპიური ქარტიის განუხრელი დაცვის უზრუნველყოფა;
  - 2.4. მაღალი მიღწევების სპორტის და მასობრივი სპორტის განვითარების ხელშეწყობა;
  - 2.5. სპორტის სპეციალისტთა (მწვრთნელები, მსაჯები, ადმინისტრატორები) სწავლების ხელშეწყობა სემინარების, კურსების, ტრენინგების მოწყობის გზით და ასეთი ღონისძიებების მეშვეობით ოლიმპიზმის ძირითადი პრინციპების წარმოჩენა;
  - 2.6. სპორტში ნებისმიერი სახის დისკრიმინაციისა და ძალადობის წინააღმდეგ ზომების მიღება;

- 2.7. საერთაშორისო ოლიმპიური კომიტეტის და საერთაშორისო სპორტული ფედერაციების მიერ აკრძალული ნივთიერებებისა და პროცედურების გამოყენების წინააღმდეგ შესაბამისი ღონისძიებების გატარება; მსოფლიო ანტი-დოპინგური კოდექსის აღიარება და განხორციელება იმგვარად, რომ სეოკ-ის ანტი-დოპინგური კურსი და წესები, წევრობასთან და/ან დაფინანსებასთან დაკავშირებული მოთხოვნები და შედეგების მართვის პროცედურები სრულად შეესაბამებოდეს მსოფლიო ანტი-დოპინგურ კოდექსს და აღიარებდეს ამ კოდექსში მოცემულ ეოკ-ის ყველა ვალდებულებასა და როლს;
3. სეოკ-ს გააჩნია ექსკლუზიური უფლება: განსაზღვროს, შეადგინოს, ორგანიზაცია გაუკეთოს და უხელმძღვანელოს თავის დელეგაციას ოლიმპიურ თამაშებზე, რეგიონალურ, კონტინენტურ და მსოფლიო კომპლექსურ (მრავალსახეობრივ) სპორტულ შეჯიბრებებზე, რომლებიც ტარდება საერთაშორისო ოლიმპიური კომიტეტისა და ევროპის ოლიმპიური კომიტეტების პატრონაჟით ან ეგიდით. ამასთანავე, სეოკ-ი ვალდებულია მონაწილეობა მიიღოს ოლიმპიურ თამაშებში სპორტსმენთა წარგზავნის სახით;
4. სეოკ-ი უფლებამოსილია დაასახელოს ქალაქი, რომელსაც შეუძლია განაცხადი წარადგინოს, საქართველოში სოკ-ის და ევროპის ოლიმპიური კომიტეტების ეგიდითა და პატრონაჟობით დაგეგმილი სპორტული შეჯიბრებების ორგანიზაციასა და ჩატარებაზე.
5. სეოკ-ი ზრუნავს თავის დელეგაციის წევრთა ეკიპირებაზე (დელეგაციის წევრებთან შეთანხმებით), მგზავრობასა და დაბინავებაზე, მათ სასარგებლოდ აფორმებს ხელშეკრულებებს, აზღვევს უბედური შემთხვევებისგან (სიკვდილი, ავადმყოფობა, სამედიცინო და ფარმაცევტული ხარჯები) და სამოქალაქო პასუხისმგებლობას კისრულობს მესამე პირთა წინაშე. სეოკ-ი პასუხისმგებელია თავისი დელეგაციის წევრთა ქცევაზე.
6. სეოკ-ს გააჩნია ერთპიროვნული და ექსკლუზიური უფლება, მიიღოს გადაწყვეტილება და განსაზღვროს, თუ როგორი ტანსაცმელი და ფორმა უნდა ატარონ და რა ინვენტარით უნდა ისარგებლონ მისი დელეგაციის წევრებმა ოლიმპიურ თამაშებზე, მასთან დაკავშირებულ ნებისმიერ სპორტულ შეჯიბრებებზე და ცერემონიებზე. ეს ექსკლუზიური უფლება არ ვრცელდება სპეციალურ ეკიპირებასა და აღჭურვილობაზე, რომელსაც დელეგაციის წევრი სპორტსმენები ატარებენ და იყენებენ სპორტული შეჯიბრებების დროს.
7. ოლიმპიური მოძრაობის პოპულარიზაციის მიზნით სეოკ-ი დაინტერესებულ ორგანიზაციებთან ერთად ყოველწლიურად ატარებს ოლიმპიურ კვირეულებს, როგორც საერთაშორისო ოლიმპიური ისე საქართველოს ოლიმპიური დღისადმი მიძღვნილ მასობრივ გარბენებსა და სხვადასხვა სახის სპორტულ ღონისძიებებს.
8. სეოკ-ი წარადგენს თავის კანდიდატს საერთაშორისო ოლიმპიურ კომიტეტისა თუ სოკ-ის კომისიების შემადგენლობაში.
9. სეოკ-ი ზრუნავს სპორტისა და ოლიმპიზმის სფეროში კულტურისა და ხელოვნების პროპაგანდაზე, მონაწილეობს ოლიმპიური სოლიდარობის პროგრამებში.
10. სეოკ-ი თავის მოსაზრებებს უზიარებს სოკ-ს ოლიმპიური ქარტიის, ოლიმპიური თამაშების, მათი ორგანიზაციისა და ჩატარების, ასევე ოლიმპიური მოძრაობის სხვა საკითხებთან დაკავშირებით.
11. სეოკ-ი ზრუნავს თანამშრომლობის დამყარებაზე საერთაშორისო ოლიმპიურ კომიტეტთან, ევროპის ოლიმპიურ კომიტეტებთან, ოლიმპიურ სოლიდარობასთან, საერთაშორისო ოლიმპიურ აკადემიასთან, ოლიმპიურ მუზეუმთან, სხვა ქვეყნების ეოკ-ებთან, მათ რეგიონალურ და კონტინენტალურ გაერთიანებებთან, საერთაშორისო სპორტულ ფედერაციებთან და ასოციაციებთან.

12. სეოკ-ი შესაბამის ღონისძიებებს ატარებს სპორტსა და ოლიმპიურ მოძრაობაში ნებისმიერი სახის დისკრიმინაციისა და ძალადობის წინააღმდეგ, რომლებიც აკრძალულია სოკ-ისა და საერთაშორისო სპორტული ფედერაციების (სსფ) მიერ.
13. სეოკ-ი იცავს სპორტსმენების, ინვალიდი სპორტსმენების, მწვრთნელების, მსაჯების, სპორტის სხვა მუშაკებისა და სპორტის ვეტერანების ინტერესებს დადგენილი წესით.
14. სეოკ-ი მისი შესაძლებლობებისა და კომპეტენციის ფარგლებში, აქტიურად მონაწილეობს გარემოს დაცვისა და ეკოლოგიური უსაფრთხოებისთვის დაგეგმილ ღონისძიებებში.
15. სეოკ-ი ზრუნავს ქალთა ფართო მონაწილეობაზე მასობრივი და მაღალი მიღწევების სპორტში, ხელს უწყობს მათ გაერთიანებას სპორტისა და ოლიმპიური მოძრაობის მართვის სტრუქტურებში.
16. სეოკ-ი აქტიურად მონაწილეობს მოძრაობაში “სამართლიანი თამაშები“ და ფართო პროპაგანდას უწევს ქვეყანაში სპორტული ეთიკის პრინციპების დაცვას.
17. ოლიმპიური ქარტიით განსაზღვრული მისიის შესრულების მიზნით, სეოკ-ს შეუძლია ითანამშრომლოს სამთავრობო ორგანიზაციებთან, რომლებთანაც ჰარმონიული ურთიერთობა უნდა დამყარდეს, თუმცა არ უნდა დაუკავშირდეს ისეთ საქმიანობას, რომელიც ეწინააღმდეგება ოლიმპიურ ქარტიას.
- 17.1. სეოკ-ს შეუძლია ასევე ითანამშრომლოს არასამთავრობო ორგანიზაციებთან.
18. სეოკ-ი აღიარებს და თავის რიგებში აწევრიანებს საქართველოს იმ ეროვნულ ფედერაციებს, რომლებიც არიან სოკ-ის მიერ აღიარებული საერთაშორისო სპორტული ფედერაციების წევრები და თავის საქმიანობას წარმართავენ ოლიმპიური ქარტიისა და საკუთარი წესდების შესაბამისად.
- 18.1. სეოკ-ი სპორტის ყოველ სახეობაში ცნობს მხოლოდ ერთ ეროვნულ სპორტულ ფედერაციას.
19. სეოკ-ი სამთავრობო და არასამთავრობო ორგანიზაციებთან ურთიერთობისას ინარჩუნებს თავის ავტონომიას და არ ექცევა არავითარი პოლიტიკური, რელიგიური და ეკონომიკური ზეგავლენის ქვეშ, რომლებსაც შეუძლიათ საქართველოში ოლიმპიური ქარტიის მოთხოვნათა განხორციელების შეფერხება.

### III. სეოკ-ის უფლებები

1. მხოლოდ სეოკ-ის ექსკლუზიური უფლებაა საქართველოში იყოს რეგისტრირებული და საქმიანობდეს “ეროვნული ოლიმპიური კომიტეტი“-ს სახელწოდებით.
2. სეოკ-ის უფლებებია:
  - 2.1. ოლიმპიური ქარტიის შესაბამისად უზრუნველყოს ოლიმპიური დელეგაციის (სპორტსმენები, გუნდის ხელმძღვანელები და გუნდის სხვა პერსონალი) მონაწილეობა ოლიმპიურ თამაშებზე;
  - 2.2. ისარგებლოს ოლიმპიური სოლიდარობის დახმარებით;
  - 2.3. გამოიყენოს განსაზღვრული ოლიმპიური რეკვიზიტები სოკ-ის მიერ მინიჭებული უფლების საფუძველზე, ასევე მასთან დაკავშირებული წესებისა და მათი განმარტებების შესაბამისად;
  - 2.4. გაერთიანდეს სოკ-ის მიერ აღიარებულ ეოკ-თა ასოციაციებში;
  - 2.5. გამოთქვას საკუთარი მოსაზრება ოლიმპიური თამაშების მასპინძლობის კანდიდატურებთან დაკავშირებით;

- 2.6. მონაწილეობა მიიღოს სოკ-ის თხოვნით სოკ-ის კომისიების მუშაობაში, სოკ-ის მიერ ან მისი ეგიდით წარმართულ საქმიანობაში, მათ შორის - რეგიონალურ თამაშებში;
- 2.7. ითანამშრომლოს სოკ-ის კონგრესების მომზადების პროცესში.
- 2.8. ისარგებლოს სეოკ-ისთვის ოლიმპიური ქარტიითა და სოკ-ის მიერ მინიჭებული სხვა უფლებებით.
3. სეოკ-ი იღებს დახმარებას საკუთარი მოვალეობის შესრულებისთვის სოკ-ის სხვადასხვა დეპარტამენტებისა და ოლიმპიური სოლიდარობისგან.
4. ოლიმპიური ქარტიის დარღვევის შემთხვევაში დადგენილ ღონისძიებებთან და სანქციებთან ერთად სოკ-ის აღმასრულებელ საბჭოს შეუძლია ეოკ-ის ქვეყანაში ოლიმპიური მოძრაობის დაცვის მიზნით მიიღოს ნებისმიერი შესაბამისი გადაწყვეტილება, მათ შორის ამ ეოკ-ის აღიარების გაუქმების ან შეწყვეტის შესახებ, იმ შემთხვევაში, თუ ქვეყანაში მოქმედი კანონი ან სხვა დებულება, ან სამთავრობო ან სხვა ორგანოს რომელიმე აქტი განაპირობებს სეოკ-ის საქმიანობის ან მისი ნების გამოხატვის შეზღუდვას.
5. ქვეყნის ხელისუფლება თანამშრომლობს სეოკ-თან მხოლოდ ხელშეკრულების საფუძველზე კანონით ნებადართული ნებისმიერი ფორმით, თუკი ასეთი პირდაპირ ან ირიბად არ ეწინააღმდეგება ოლიმპიური ქარტიის დებულებებსა და წინამდებარე წესდებით განსაზღვრულ სეოკ-ის საქმიანობას და მიზნებს.

#### IV. სეოკ-ის წევრები

1. სეოკ-ის წევრი შეიძლება გახდეს საქართველოს ნებისმიერი იურიდიული პირი, აგრეთვე ფიზიკური პირი, რომლებიც აღიარებენ ოლიმპიურ ქარტიას, წინამდებარე წესდებს, განსაკუთრებულ სამსახურს უწევენ მაღალი მიღწევების სპორტსა და ოლიმპიზმს.
  - 1.1. რეკომენდაციას მათი სეოკ-ის წევრად მიღების თაობაზე წარმოადგენენ ეროვნული სპორტული ფედერაციები, სეოკ-ის რეგიონალური ორგანიზაციები, ასოციაციები ან სეოკ-ის მიერ აღიარებული სხვა სპორტული ორგანიზაციები;
  - 1.2. სეოკ-ის პრეზიდენტი, აღმასკომის წევრი უფლებამოსილია წარადგინოს (აღმასკომზე, სესიაზე) სეოკ-ის წევრობის კანდიდატი.
2. სეოკ-ის შემადგენლობაში აუცილებლად უნდა შედიოდნენ:
  - 2.1. ორი წარმომადგენელი საერთაშორისო სპორტულ ფედერაციებში გაწევრიანებული ეროვნული სპორტული ფედერაციებიდან, რომელთა სახეობები შეტანილია ოლიმპიური თამაშების პროგრამაში. სპორტის ეროვნული ფედერაცია აღიარებული უნდა იყოს შესაბამისი საერთაშორისო სპორტული ფედერაციის მიერ.
 

თითოეულ ასეთ სპორტულ ფედერაციას უნდა ჰქონდეს სეოკ-ის აღმასკომის მიერ დადგენილი კრიტერიუმებით განსაზღვრული მონაცემთა ბაზა. ეროვნული ფედერაციები ყოველი ოლიმპიური ციკლის დაწყებისთანავე (არაუგვიანეს 6 თვისა), სეოკ-ში წარმოადგენენ დოკუმენტებსა და მასალებს, რომლებიც ადასტურებენ, რომ ისინი კომპეტენციის ფარგლებში ეწევიან სპეციფიკურ და აქტიურ სპორტულ საქმიანობას როგორც საქართველოში, ისე საერთაშორისო დონეზე, რომელიც ძირითადად გამოიხატება სხვადასხვა რანგის შეჯიბრებების ორგანიზაციითა და მათში მონაწილეობით, აგრეთვე სპორტსმენთა და საწვრთნელი პროგრამების განხორციელებით;
  - 2.2. ეოკ-ის სპორტსმენთა კომისიიდან შერჩეული მინიმუმ ორი მოქმედი სპორტსმენი, ერთი ქალი და ერთი კაცი, რომლებსაც მონაწილეობა აქვთ მიღებული ოლიმპიურ თამაშებში და გააჩნიათ ეოკ-ის სესიაზე ხმის უფლება;

3. სეოკ-ის წევრი შეიძლება გახდეს:
  - 3.1. ერთი წარმომადგენელი იმ ეროვნული ფედერაციებიდან, რომელთა სპორტის სახეობები არ არის შეტანილი ოლიმპიური თამაშების პროგრამაში, მაგრამ არიან სოკ-ის მიერ აღიარებული საერთაშორისო ფედერაციების წევრები.
4. სეოკ-ის წევრი შეიძლება ასევე გახდეს ერთი წარმომადგენელი საქართველოსთვის ტრადიციული სპორტის ეროვნული ფედერაციებიდან.
5. მთავრობამ ან სხვა სახელმწიფო ორგანომ არ უნდა დანიშნოს სეოკ-ის არც ერთი წევრი. თუმცა სეოკ-ს შეუძლია თავისი შეხედულებისამებრ მიიღოს გადაწყვეტილება, რომ წევრად აირჩიოს ასეთი ორგანოს წარმომადგენელი.
6. სეოკ-ისა და მისი აღმასრულებელი ორგანოს ამომრჩეველ უმრავლესობას უნდა შეადგენდნენ ზემოთ IV პარაგრაფის 2.1. მუხლში აღნიშნული სპორტის ოლიმპიური სახეობების ფედერაციების ხმები. ოლიმპიურ თამაშებთან დაკავშირებული საკითხების გადაწყვეტისას მხედველობაში მიიღება მხოლოდ ეოკ-ის აღმასრულებელი ორგანოს წევრებისა და ოლიმპიურ სახეობათა ეროვნული ფედერაციების მიერ მიცემული ხმები.
7. ოლიმპიური ქარტიის შესაბამისად, საერთაშორისო ოლიმპიური კომიტეტის წევრი საქართველოში, რომელიც წარმოადგენს სოკ-ს, ითვლება როგორც სეოკ-ის, ისე მისი აღმასკომის წევრად და გააჩნია ხმის უფლება სეოკ-ის სესიაზე და მის აღმასკომის სხდომებზე.
8. სეოკ-ის წევრებს არ ეკისრებათ პირადი პასუხისმგებლობა სეოკ-ის დავალიანებებთან, ან სხვა ვალდებულებებთან დაკავშირებით, თუ ისინი უშუალოდ არ არიან კავშირში აღნიშნულთან.
9. სეოკ-ის წევრები ფუნქციებს ასრულებენ საზოგადოებრივ საწყისებზე, გარდა მართვის აპარატის თანამშრომლებისა.
10. წევრად მიღებისა და წევრის უფლების შეჩერების გადაწყვეტილებას იღებს აღმასკომის სხდომა, ხოლო წევრის უფლების შეწყვეტისა (გასვლისა) და გარიცხვის გადაწყვეტილებას იღებს სესია (საერთო კრება).

## V. სეოკ-ში წევრად შესვლა და შემადგენლობიდან გასვლა

1. ამ წესდების IV პარაგრაფით გათვალისწინებული იურიდიული და ფიზიკური პირების სეოკ-ში წევრად შესვლა და შემადგენლობიდან გასვლა ნებაყოფლობითია.
2. გაწევრიანების მსურველი პირი, განცხადებით და ამ წესდებით განსაზღვრული არგუმენტაციით მიმართავს სეოკ-ის აღმასკომს.  
სეოკ-ის აღმასკომი ვალდებულია წევრად მიღების ან არმიღების საკითხი გადაწყვიტოს განცხადების წარდგენიდან 6 თვის ვადაში ოლიმპიური ქარტიისა და ამ წესდებით გათვალისწინებული პროცედურების სრული დაცვით. სეოკ-ის აღმასკომის გადაწყვეტილება ახალი წევრის მიღების შესახებ საბოლოო დამტკიცებისთვის წარედგინება გენერალურ ასამბლეას (სესიას).
3. სეოკ-ის წევრის განცხადებას შემადგენლობიდან გასვლის შესახებ თან ერთვის აღმასკომის დასკვნა მის მიერ ნაკისრი ვალდებულების სრული და ჯეროვანი შესრულების შესახებ და სესიამდე უფლებამოსილების (წევრობის) შეჩერების შესახებ დადგენილება.  
წევრი სეოკ-იდან გასულად ითვლება სესიის მიერ შესაბამისი დადგენილების მიღების შემდეგ.
4. ამ პარაგრაფით გათვალისწინებული ვადის ათვლა იწყება მხოლოდ წინამდებარე წესდებით განსაზღვრული ყველა აუცილებელი დოკუმენტის ან/და სეოკ-ის მიერ განსაზღვრული ვალდებულების შესრულების შემდეგ.

5. სეოკ-ის შემადგენლობიდან გასულ წევრს უწყდება წინამდებარე წესდებით განსაზღვრული უფლება-მოვალეობები.

## VI. სეოკ-ის წევრთა უფლება-მოვალეობები

1. სეოკ-ის მიერ წინამდებარე წესდებით უზრუნველყოფილია და გარანტირებულია წევრის უფლება:
  - 1.1. წარმოადგინოს მისი და მისი წევრების ინტერესები და ორგანიზაციები;
  - 1.2. აირჩიოს ან არჩეულ იყოს სეოკ-ის ყველა არჩევით თანამდებობაზე;
  - 1.3. წარმოადგინოს წინადადებები და აქტიური მონაწილეობა მიიღოს სეოკ-ის გადაწყვეტილებების, დადგენილებების შესრულების, საერთო ღონისძიებების მომზადებისა და ჩატარების პროცესში;
  - 1.4. მიიღოს ინფორმაცია სეოკ-ის საქმიანობის შესახებ, აქტიურად მონაწილეობდეს სეოკ-ის არჩევითი ორგანოების მუშაობაში;
  - 1.5. სეოკ-ის აღმასკომის დავალებით მონაწილეობა მიიღოს თათბირებში, კონფერენციებში და კონგრესებში, რომლებსაც ატარებენ სოკ-ი და საერთაშორისო სპორტული გაერთიანებები. იგი ასევე უფლებამოსილია გაეცნოს საქართველოს სპორტული ფედერაციებისა და მათი წარმომადგენლების საქმიანობას საერთაშორისო ფედერაციებში;
  - 1.6. დადგენილი წესით წინადადებით შევიდეს სეოკ-ის აღმასკომში და წარადგინოს მოსაზრებები სესიზე განსახილველად აუცილებელ და მნიშვნელოვან საკითხებზე;
  - 1.7. გავიდეს სეოკ-ის შემადგენლობიდან;
  - 1.8. მონაწილეობა მიიღოს საქართველოს ეოკ-ის კომისიებისა და სეოკ-ის მიერ აღიარებული ფედერაციების საქმიანობაში.
2. სეოკ-ის წევრები ვალდებული არიან:
  - 2.1. დაიცვან და შეასრულონ სეოკ-ის წესდება;
  - 2.2. დაიცვან ოლიმპიური ქარტია და იგივე მოითხოვონ წევრი პირებისაგან;
  - 2.3. გაითვალისწინონ და საქმიანობაში ასახონ სეოკ-ის მართვის ორგანოების რეკომენდაციები;
  - 2.4. არ დაუშვან ქმედება და წინ აღუდგნენ ყოველგვარ გამოვლინებას, რომელიც ზიანს მიაყენებს სეოკ-სა და მის წევრ ორგანიზაციებს;
  - 2.5. პოპულარიზაცია გაუწიონ ოლიმპიური მოძრაობის პრინციპებს და იზრუნონ მათ დაცვაზე;
  - 2.6. დადგენილ ვადაში და ჯეროვნად შეასრულონ სეოკ-ის მიერ დაკისრებული ვალდებულებები;
  - 2.7. განუხრელად დაიცვან და ხელი შეუწყონ სეოკ-ის ავტონომიას სოკ-ის იურისდიქციის ფარგლებში;
  - 2.8. წევრი ორგანიზაცია ვალდებულია მიაწოდოს სეოკ-ს ინფორმაცია საკუთარ წესდებაში ცვლილებებისა და დამატებების, პრინციპულ საკითხებზე მიღებული დადგენილებების, ხელმძღვანელ ორგანოებში ცვლილებებისა და სხვა არსებითად მნიშვნელოვანის შესახებ;
  - 2.9. სეოკ-ში წარადგინოს სტატისტიკური ანგარიშები და შედეგები დადგენილი ფორმებისა და ვადების შესაბამისად;
  - 2.10. ისარგებლონ მათთვის ოლიმპიური ქარტიითა და სოკ-ის მიერ მინიჭებული სხვა უფლებებით;
  - 2.11. სეოკ-ის წევრები, გარდა აღმინისტრაციაში დასაქმებული პირებისა, არ იღებენ ხელფასს ან რაიმე სახის პრემიას მათ მიერ გაწეული სამუშაოს საკომპენსაციოდ.

3. სეოკ-ის წევრი კარგავს სტატუსს თუ:
  - ლიკვიდირებული იქნება ორგანიზაცია;
  - შეიცვლის საქართველოს მოქალაქეობას ან გაიწვევა იმ ორგანიზაციის მოთხოვნით, რომლის რეკომენდაციითაც იგი იყო სეოკ-ის წევრად არჩეული (გარდა საპატიო წევრისა, ასეთის არსებობის შემთხვევაში);
  - გადადგება.
4. სეოკ-ის წევრის პასუხისმგებლობა:
  - 4.1. სეოკ-ის წევრს შეიძლება შეუჩერდეს უფლებამოსილება აღმასკომის წევრთა უბრალო უმრავლესობის გადაწყვეტილებით უახლოესი სესიის ჩატარებამდე ვადით, თუ:
    - დაარღვევს ოლიმპიური ქარტიით და ამ წესდებით განსაზღვრულ მოთხოვნებს ან ჩაიდენს მოქალაქისთვის შეუფერებელ საქციელს, რომელიც შეუთავსებელი იქნება სეოკ-ის წევრობასთან;
    - ორი წლის განმავლობაში არ დაესწრება სეოკ-ის სესიებს (გარდა საპატიო წევრისა);
    - ვერ ან არ ასრულებს დაკისრებულ მოვალეობას.  
თუმცა, წევრის უფლებამოსილების შეწყვეტის შესახებ საბოლოო გადაწყვეტილებას ღებულობს ეოკ-ის სესია და წევრი მოსმენილ უნდა იქნას სესიის მიერ ასეთი გადაწყვეტილების მიღებამდე.
5. სეოკ-ში ხანგრძლივი და ნაყოფიერი მუშაობის შემდეგ გადამდგარი პირი აღმასკომის წარდგინებით სესიამ შეიძლება აირჩიოს სეოკ-ის საპატიო პრეზიდენტად, საპატიო ან დამსახურებულ წევრად.
  - 5.1. აღნიშნული სტატუსი ძალაშია სიცოცხლის ბოლომდე, თუ აღგილი არ ექნება 4.1. გარემოებას.
  - 5.2.
    - საპატიო პრეზიდენტი;
    - საპატიო წევრები;
    - დამსახურებული წევრები;
 მოქმედი პრეზიდენტის მიერ მოიწვევიან სეოკ-ის მიერ ორგანიზებულ ღონისძიებებზე, ისინი ესწრებიან სესიებს და აღმასკომის სხდომებს.
  - 5.3. მათ არ აქვთ ხმის უფლება. ისინი ატარებენ კონსულტაციებს პრეზიდენტის თხოვნით.
  - 5.4. საპატიო პრეზიდენტი სესიებზე და აღმასკომის სხდომებზე სარგებლობს სათათბირო ხმის უფლებით, იგი უფლებამოსილია სესიას და აღმასკომს შესთავაზოს რჩევა ან რეკომენდაცია.

## VII. სეოკ-ის ხელმძღვანელი ორგანოები

1. საწესდებო მიზნების განხორციელებისა და წევრი პირებისთვის სეოკ-თან მჭიდრო მობილური ურთიერთობებისთვის სეოკ-ში იქმნება რეგიონალური ოლიმპიური კომიტეტები (სეოკ-ის ფილიალები).
2. პრეზიდენტი საჭიროებისამებრ ქმნის მუდმივ ან სხვა რეგულარულ, საგანგებო კომისიებს და მუშა ჯგუფებს სესიისთვის, სეოკ-ის აღმასრულებელი კომიტეტისა და პრეზიდენტისთვის კონსულტაციების გაწვევის მიზნით.
3. სეოკ-ის ხელმძღვანელი ორგანოებია:
  - სესია (საერთო კრება);
  - აღმასრულებელი კომიტეტი (გამგეობა).

### VIII. სესია (საერთო კრება)

1. სესია წარმოადგენს სეოკ-ის გენერალურ შეკრებას (საერთო კრებას). იგი სეოკ-ის უზენაესი ორგანოა. სესია მოიწვევა აღმასკომის მიერ არანაკლებ წელიწადში ერთხელ. სეოკ-ს სესიის დღის წესრიგში შეაქვს წლიური და აუდიტის ფინანსური ანგარიშების პრეზენტაცია და ამავე დროს შეექმნილი ვითარების მიხედვით თანამდებობის პირებისა და წევრების აღმასკომში არჩევის საკითხი. სეოკ-ის თანამდებობის პირებისა და წევრების არჩევა სეოკ-ის წესდების მიხედვით ხორციელდება არაუმეტეს ოთხი წლის ვადით; შეესაძლებელია მათი ხელახლა არჩევა.
  - 1.1. საარჩევნო-საანგარიშო სესია მოწვეულ უნდა იქნას ოთხ წელიწადში ერთხელ ზაფხულის ოლიმპიური თამაშების დამთავრებისთანავე, ოქტომბრის თვის პირველ დეკადაში.
  - 1.2. ვადამდელი ან გადავადებით არჩევნების ჩატარება შესაძლებელია აღმასკომის დადგენილებით, შესაბამისი აუცილებლობის დამადასტურებელი არგუმენტის არსებობის შემთხვევაში.
2. რიგგარეშე სესიის მოწვევა შესაძლებელია პრეზიდენტის, ან აღმასკომის წევრთა ერთი მესამედის მიერ წერილობითი მოთხოვნის საფუძველზე ან სესიის წევრთა 1/4-ის ინიციატივით.
3. საანგარიშო-საარჩევნო სესიის ჩატარების თარიღი და დღის წესრიგი ცხადდება საინფორმაციო საშუალებებით მინიმუმ 45 დღით ადრე.
  - 3.1. სეოკ-ის აღმასკომი, ყოველი საანგარიშო-საარჩევნო სესიის წინ ადგენს სეოკ-ის წესდების მე-4 პარაგრაფით განსაზღვრული ორგანიზაციების წარმომადგენლობით კვოტებს ამ წესდების პარაგრაფი IV-ის საფუძველზე. ეს ორგანიზაციები თავიანთ დელეგატებს სესიას წარუდგენენ მათი უმაღლესი საარჩევნო ორგანოს (სესიის, აღმასკომის) გადაწყვეტილებით. სეოკ-ის ყველა წევრს აქვს კენჭისყრაში მონაწილეობის უფლება.
  - 3.2. სესია უფლებამოსილია, თუ მას ესწრება სეოკ-ის ხმის უფლების მქონე წევრთა უბრალო უმრავლესობა (50%+1).
4. რიგგარეშე სესია - გარდა საარჩევნო სესიისა, მოიწვევა ამ პარაგრაფის მე-2 მუხლით გათვალისწინებული წესით მინიმუმ ერთი თვით ადრე.
5. სეოკ-ის აღმასრულებელი კომიტეტი პასუხისმგებელია სესიების ორგანიზებასა და მომზადებაზე.
6. სესიაზე ოფიციალურად მოწვევა ხდება პრეზიდენტის გადაწყვეტილებით.
7. სესიის თავმჯდომარეა პრეზიდენტი, ხოლო მისი არყოფნის ან უუნარობის შემთხვევაში - პირველი ვიცე-პრეზიდენტი, ასეთის არყოფნის შემთხვევაში კი - ასაკით უფროსი ვიცე-პრეზიდენტი.
8. გარდა საპრეზიდენტო არჩევნებისა, პრეზიდენტი ადგენს რეგლამენტს ყველა სესიის ჩასატარებლად.
  - 8.1. საპრეზიდენტო არჩევნების რეგლამენტს პრეზიდენტის წარდგინებით ადგენს აღმასკომი.
9. სესიებთან და კენჭისყრასთან დაკავშირებულ ნებისმიერ პროცედურას, რომელიც არ არის გათვალისწინებული ოლიმპიური ქარტიით ან ამ წესდებით, პრეზიდენტის თხოვნით ადგენს სეოკ-ის აღმასკომი ან სესია.
10. სესიის ოქმებისა და სხვა პროცედურების წარმოება ხორციელდება პრეზიდენტის ხელმძღვანელობით.
11. სესიის პროცედურული მუშაობისთვის აუცილებელია ქვორუმი, სეოკ-ის წევრთა მთლიანი რაოდენობის ნახევარს პლუს ერთი. სესიის გადაწყვეტილება მიიღება

ხმათა უბრალო უმრავლესობით, გარდა - კანონით გათვალისწინებული შემთხვევებისა.

- 11.1. სეოკ-ის წესდებაში ცვლილებების მისაღებად საჭიროა სესიაზე დამსწრე დელეგატთა ორი მესამედი.
12. ყოველ დელეგატს გააჩნია ერთი ხმა. თავის შეკავება ან გაუქმებული ხმები საჭირო უმრავლესობის დათვლისას მხედველობაში არ მიიღება. ოლიმპიური ქარტიის დებულებების შესაბამისად, სესია უფლებამოსილია, თუ დამსწრე დელეგატთა უმრავლესობას წარმოადგენენ სპორტის ოლიმპიურ სახეობათა ფედერაციები, რომლებიც თავის მხრივ შესაბამისი საერთაშორისო ფედერაციების წევრები არიან. კენჭისყრა შეესაძლებელია იყოს ღია ან ფარული შექმნილი გარემოების მიხედვით, მაგრამ თანამდებობის პირებისა და წევრების არჩევნების შემთხვევაში კენჭისყრა იქნება ფარული.
- 12.1. სხვის ნაცვლად ხმის მიცემა აკრძალულია.
- 12.2. ხმათა თანაბრად გაყოფის შემთხვევაში გადაწყვეტილებას იღებს სესიის თავმჯდომარე.
13. სესიამ, დამსწრეთა 2/3-ის გადაწყვეტილებით, შეუძლია გადასცეს გარკვეული უფლებამოსილება აღმასკომს.
14. სესიის ნებისმიერი გადაწყვეტილება წესდებაში ცვლილებების გამოკლებით, ძალაში შედის დაუყოვნებლივ, თუ სესია არ გამოიტანს სხვაგვარ დადგენილებას.
- 14.1. საკითხი, რომელიც არ არის შეტანილი სესიის დღის წესრიგში, შეიძლება განხილულ იქნას დამსწრეთა უმრავლესობის (50% +1) მოთხოვნით.
15. სესიის ჩატარების დროს დგება ოქმი. ოქმს ხელს აწერს სესიის თავმჯდომარე და მდივანი.
- 16. სესიას გააჩნია შემდეგი უფლებამოსილებანი:**
  - 16.1. როგორც რიგითი, ისე საარჩევნო სესია უფლებამოსილია მიიღოს და ცვლილება შეიტანოს სეოკ-ის წესდებაში;
  - 16.2. მოისმინოს და დაამტკიცოს წლიური საანგარიშო მოხსენება და ანგარიშები;
  - 16.3. განსაზღვროს სეოკ-ის საქმიანობის ძირითადი მიმართულებები;
  - 16.4. მოისმინოს საქართველოში ოლიმპიური მოძრაობის განვითარებისა და საერთაშორისო ოლიმპიურ მოძრაობაში მონაწილეობის საკითხები;
  - 16.5. მიიღოს გადაწყვეტილება ოლიმპიური თამაშებისათვის მზადებისა და მასში მონაწილეობის შესახებ;
  - 16.6. მიიღოს გადაწყვეტილება სეოკ-ის ლიკვიდაციისა და რეორგანიზაციის შესახებ, აგრეთვე დაამტკიცოს სალიკვიდაციო კომისია;
  - 16.7. სახელმწიფო სტრუქტურებიდან აირჩიოს სეოკ-ის წევრები;
  - 16.8. განიხილოს და დაამტკიცოს სეოკ-ის საპატიო პრეზიდენტის, წევრის და დამსახურებული წევრის სტატუსი;
  - 16.9. სეოკ-ის მიერ სესიაზე წარდგენილი ფინანსური ანგარიშისა და აუდიტის დასკვნის მოსმენა და მასზე რეაგირება;
  - 16.10. გამოიტანოს გადაწყვეტილება ეროვნული სპორტული ფედერაციების, ასოციაციების და სხვა ორგანიზაციების აღიარების გაცემისა ან გაუქმებასთან დაკავშირებით;
  - 16.11. გარიცხოს სეოკ-ის წევრები და გააუქმოს საპატიო პრეზიდენტის, საპატიო წევრისა და დამსახურებული წევრის სტატუსი;
  - 16.12. დააწესოს სეოკ-ის ჯილდოები და განსაზღვროს დაჯილდოების წესები, პირობები და ფორმები;
  - 16.13. მიიღოს გადაწყვეტილება მისთვის კანონით დაკისრებულ და ოლიმპიური ქარტით გათვალისწინებულ სხვა საკითხებთან დაკავშირებით.

### IX. სეოკ-ის აღმასრულებელი კომიტეტი (გამგეობა)

1. სესიებს შორის პერიოდში მართვის ფუნქციებს ახორციელებს საანგარიშო-საარჩევნო სესიის მიერ არჩეული სეოკ-ის აღმასრულებელი კომიტეტი (გამგეობა) - აღმასკომი.
2. სეოკ-ის აღმასკომი შედგება 17 წევრისგან: პრეზიდენტი, პირველი ვიცე-პრეზიდენტი, ორი ვიცე-პრეზიდენტი და გენერალური მდივანი. აგრეთვე, თორმეტი სხვა წევრისგან, რომელთა პერსონალურ სიას სესიას წარუდგენს პრეზიდენტი და ამტკიცებს სესია.
3. სეოკ-ის წევრი, რომელიც არ ესწრება სესიის სხდომას, შეიძლება დასახელებულ იქნას აღმასკომის წევრობის კანდიდატად იმ შემთხვევაში, თუ ასეთი პირისაგან აღმასკომს აქვს წერილობითი თანხმობა.
4. აღმასკომის წევრის უფლებამოსილება გრძელდება მორიგი საარჩევნო სესიის ჩატარებამდე.
5. გარკვეული მიზეზის გამო აღმასკომის წევრის (წევრების) გამოკლების ან შეცვლის აუცილებლობის შემთხვევაში უახლოეს სესიამდე შესაძლებელია ახალი წევრების არჩევა და აღმასკომზე კანდიდატურების განხილვა. შემდგომ ისინი დასამტკიცებლად წარედგინება ეოკ-ის სესიას.
6. თუ წევრობის გაუქმების ან აღმასკომის წევრის შეცვლის შესახებ საკითხს მხარს დაუჭერს აღმასკომის წევრთა უმრავლესობა, შესაძლებელია ცალკეული წევრის შეცვლა ახალი წევრით, რაც ექვემდებარება ეოკ-ის სესიის მიერ საბოლოო რატიფიკაციას.
7. აღმასკომის შემადგენლობაში უმრავლესობას უნდა წარმოადგენდნენ სპორტის ოლიმპიური სახეობების ფედერაციათა წარმომადგენლები, რომლებიც თავის მხრივ შესაბამისი საერთაშორისო ფედერაციების წევრები არიან.
8. პრეზიდენტის მოწვევით აღმასკომი იკრიბება საჭიროებისამებრ, მაგრამ არანაკლებ 6 თვეში ერთხელ (რიგგარეშე სხდომა ინიშნება პრეზიდენტის ან აღმასკომის წევრთა ნახევრის მოთხოვნით).
9. აღმასკომის სხდომის ჩატარების შესახებ დღის წესრიგი აღმასკომის თითოეულ წევრს ეგზავნება წერილობით, ეცნობება ელ-ფოსტით ან კომუნიკაციის სხვა თანამედროვე საშუალებებით, სხდომის ჩატარებამდე არაუგვიანეს 10 დღისა.
10. აღმასკომის სხდომის თავმჯდომარეა პრეზიდენტი, ხოლო მისი არყოფნის ან უუნარობის შემთხვევაში - პირველი ვიცე-პრეზიდენტი. ამ უკანასკნელის არყოფნის ან უუნარობის შემთხვევაში -ასაკით უფროსი ვიცე-პრეზიდენტი.
11. აღმასკომის სხდომა უფლებამოსილია, თუ მას ესწრება წევრთა უმრავლესობა.
12. აღმასკომის სხდომა გადაწყვეტილებებს იღებს ხმათა უმრავლესობით.
13. აღმასკომის თითოეულ წევრს აქვს ერთი ხმა.
14. მინდობილობით ხმის მიცემა აკრძალულია.
15. ხმის მიცემა ხდება ღია კენჭისყრით, ან ფარული კენჭისყრით, თუ ასე მოითხოვს დამსწრე წევრთა ნახევარზე მეტი. ხმათა თანაბრად გაყოფის შემთხვევაში გადაწყვეტილებას იღებს სხდომის თავმჯდომარე.
16. ხმების დათვლისას თავის შეკავება ან გაუქმებული ხმები არ მიიღება მხედველობაში.
17. პრეზიდენტი პასუხისმგებელია სეოკ-ის აღმასრულებელი კომიტეტის ყველა შეკრების ორგანიზებასა და მომზადებაზე. მას შეუძლია ამ მიზნით თავისი უფლებამოსილება ნაწილობრივ გადასცეს პირველ ვიცე-პრეზიდენტს, ვიცე-პრეზიდენტს ან გენერალურ მდივანს.

18. აღმასკომის სხდომასთან დაკავშირებული პროცედურების ნებისმიერ საკითხს, რომელსაც არ მოიცავს ოლიმპიური ქარტია, ადგენს პრეზიდენტი.
19. სეოკ-ის პრეზიდენტს შეუძლია ჩაატაროს აღმასკომის სხდომა ტელე-აუდიო კონფერენციის ან გამოკითხვის წესით.
20. პრეზიდენტი სეოკ-ის ყოველდღიურ საქმიანობისას ხელმძღვანელობს სეოკ-ის წესდებით და სესიის მიერ მიღებული გადაწყვეტილებებით.
21. აღმასკომის ყველა სხდომის ოქმებისა და სხვა პროცედურების წარმოება ხორციელდება პრეზიდენტის ხელმძღვანელობით და დასტურდება მისი ხელმოწერით, ან იმ პირის ხელმოწერით, რომელიც ასრულებს პრეზიდენტის მოვალეობას.
22. გარდა აღმასკომის ამ წესდებაში ზემოაღნიშნული უფლება-მოვალეობისა, აღმასკომი იღებს გადაწყვეტილებებს ხმათა უბრალო უმრავლესობით შემდეგ საკითხებზე:
  - 22.1. სეოკ-ის წესდების უზრუნველყოფისა და სეოკ-ის სესიის გადაწყვეტილებების შესრულების შესახებ;
  - 22.2. სესიის მიერ დამტკიცებული ბიუჯეტის შესაბამისად სეოკ-ის საერთო ადმინისტრაციულ-ტექნიკური და ოპერატიული ხელმძღვანელობის შესახებ;
  - 22.3. სეოკ-ის სესიის დღის წესრიგის შესახებ;
  - 22.4. ქვეყნის სპორტული ფედერაციების, საზოგადოებებისა და ასოციაციების აღიარების შესახებ;
  - 22.5. აუდიტის მოწვევისა და მისი ანგარიშის შესახებ;
  - 22.6. სეოკ-ში გასაწევრიანებელ (მისაღებ პირთა) შესახებ, რაც ექვემდებარება სესიის მიერ საბოლოო რატიფიკაციას;
  - 22.7. სეოკ-იდან გასასვლელ და გასარიცხ პირთა შესახებ, რაც ექვემდებარება სესიის მიერ საბოლოო რატიფიკაციას;
  - 22.8. სეოკ-ის მიმდინარე და პერსპექტიული გეგმების, აგრეთვე - პროგრამის შედგენისა და მათი შესრულების უზრუნველყოფის შესახებ;
  - 22.9. **იღებს გადაწყვეტილებას:** ქონების მართვისა და ფულადი სახსრების შესახებ;
  - 22.10. სეოკ-ის შემოსავლებიდან სარეზერვო, საქველმოქმედო და სხვა ფონდების შექმნის შესახებ;
  - 22.11. სეოკ-ის ყოველწლიური მოხსენება-ანგარიშის მომზადების შესახებ;
  - 22.12. სეოკ-ის ყოველწლიური შემოსავალ-გასავლის ანგარიშის მომზადების შესახებ.
23. ამტკიცებს სეოკ-ის ფინანსურ და ადმინისტრაციულ საქმიანობათა ნუსხას და კონტროლს აწესებს მათ შესრულებაზე.
24. სეოკ-ის წევრების მიერ ამ წესდების დარღვევის შემთხვევაში განიხილავს საკითხს და ახდენს რეაგირებას, ამზადებს წინადადებებს მათ მიმართ სპეციალურ ღონისძიებათა გასატარებლად.
25. საქართველოს სპორტულ ფედერაციებთან, სხვა სპორტულ სტრუქტურებთან ერთად განიხილავს და ამტკიცებს ოლიმპიური თამაშებისთვის გუნდის მომზადების გეგმებს და უზრუნველყოფს მათი შესრულების შემდგომ კონტროლს და დაფინანსებასთან დაკავშირებულ ძირითადი დებულებების შედგენას, ამტკიცებს ამ გუნდების შემადგენლობას ოლიმპიურ თამაშებზე და სეოკ-ის პატრონაჟობით ორგანიზებულ სხვა შეჯიბრებებზე გასამგზავრებლად.
26. წყვეტს სეოკ-ის წევრთა შორის ყველა სადავო საკითხს.
27. საქართველოს მთელ ტერიტორიაზე ქმნის სეოკ-ის სტრუქტურულ ქვედანაყოფებს (ან ფილიალებს), სპორტულ კომისიებს, ამტკიცებს მათ.
28. განიხილავს და ახდენს რეაგირებას სეოკ-ის კომისიებიდან და საბჭოებიდან მიღებული დასკვნების შესაბამისად.

29. მომართვებზე და შემოსულ კორესპონდენციებზე აღმასკომი არა უმეტეს ერთი თვის ვადაში განიხილავს და ახდენს რეაგირებას (გარდა ისეთი საკითხებისა, სადაც ვადა სხვაგვარადაა განსაზღვრული).
30. ოლიმპიური თამაშების საორგანიზაციო კომიტეტთან თანამშრომლობის მიზნით სეოკ-ის აღმასრულებელ კომიტეტს შეუძლია დანიშნოს თავისი წარმომადგენელი (ატაშე) და შექმნას ოლიმპიური თამაშების საორგანიზაციო კომიტეტთან კომუნიკაციის კომისია.

## X. სეოკ-ის პრეზიდენტის არჩევა

1. სეოკ-ის პრეზიდენტად შეიძლება აირჩეს დაბადებით საქართველოს მოქალაქე 35 წლის ასაკიდან, რომელსაც საქართველოში უცხოვრია 10 წელიწადი მაინც და არჩევნების დანიშნის დღეს ცხოვრობს საქართველოში.  
სეოკ-ის პრეზიდენტად არჩევა ხდება ფარული კენჭისყრით.
2. სეოკ-ის პრეზიდენტობის პოსტზე კანდიდატურის დასახელება შეუძლია სეოკ-ის აღმასკომს, სპორტის ოლიმპიურ სახეობათა ეროვნულ ფედერაციებს, საქართველოს ოლიმპიელთა ასოციაცია-კავშირს მათი არჩევითი ხელმძღვანელი ორგანოების მეშვეობით, სპორტის ოლიმპიურ სახეობათა ეროვნულ კონფედერაციას (ასეთის არსებობის შემთხვევაში).
3. სეოკ-ის პრეზიდენტად ასარჩევი კანდიდატურის შესახებ სათანადოდ გაფორმებული განცხადება საქართველოს ეროვნულ ოლიმპიურ კომიტეტში იგზავნება საანგარიშო-საარჩევნო სესიის ჩატარებამდე არანაკლებ ერთი თვით ადრე.  
სესია თავისი წევრებისგან ფარული კენჭისყრით ირჩევს პრეზიდენტს ოთხი წლის ვადით. პრეზიდენტობის ვადა განახლებას ექვემდებარება სეოკ-ის სესიის მიერ.  
პრეზიდენტობის კანდიდატი მოვალეა სესიამდე ერთი კვირით ადრე სეოკ-ის აღმასკომს წარუდგინოს და საზოგადოებრიობას გააცნოს პირველი ვიცე-პრეზიდენტის, ვიცე-პრეზიდენტების და გენერალური მდივნის ვინაობა.
4. საანგარიშო-საარჩევნო სესიაზე არჩეული სეოკ-ის პრეზიდენტი სესიის მონაწილეებს ოლიმპიური ქარტიის მოთხოვნების შესაბამისად წარუდგენს წინადადებებს სეოკ-ის აღმასკომის პერსონალური შემადგენლობის შესახებ, რაც ექვემდებარება სესიის მიერ საბოლოო დამტკიცებას.
5. ოქმი სეოკ-ის საანგარიშო სესიის, ჩატარებული არჩევნებისა და აღმასკომის წევრთა განახლების შესახებ ეგზავნება საერთაშორისო ოლიმპიურ კომიტეტს. ყველა დოკუმენტი ხელმოწერილი და დამტკიცებული უნდა იყოს სეოკ-ის პრეზიდენტისა და გენერალური მდივნის მიერ.
6. **პრეზიდენტი:**
  - პრეზიდენტი წარმოადგენს სეოკ-ს, ხელმძღვანელობს მის ნებისმიერ საქმიანობას და წარმოადგენს მას მესამე პირებთან ურთიერთობაში;
  - პასუხს აგებს სეოკ-ზე დაკისრებული ფუნქციებისა და ამოცანების შესრულებაზე;
  - განკარგავს სეოკ-ზე გამოყოფილ და მის მიერ მოზიდულ სახსრებსა და ქონებას;
  - განაგებს კადრების საკითხებს;
  - ხელმძღვანელობს ოლიმპიური კომიტეტის აპარატის საქმიანობას;
  - აწარმოებს საერთაშორისო კავშირ ურთიერთობებს;
  - დებს ხელშეკრულებებს და მოქმედებს სეოკ-ის სახელით როგორც ქვეყნის შიგნით ასევე საზღვარგარეთ;
  - კოორდინაციას უწევს სპონსორებთან ურთიერთობის საკითხებს;
  - პასუხისმგებელია სეოკ-ის აღმასკომის ყველა სხდომის მომზადებაზე, ხელმძღვანელობს აღმასკომის სხდომებს;

- განიხილავს და იღებს გადაწყვეტილებებს სპორტული დელეგაციების, აღმასკომის წევრებისა თუ აპარატის მუშაკთა მივლინებების შესახებ;
- უფლებამოსილია მიიღოს გადაწყვეტილება სოკ-ისა და სხვა საერთაშორისო ორგანიზაციებიდან მიღებული დახმარებების, გრანტების და სხვა სპეციალური ფონდების განაწილების შესახებ;
- უფლებამოსილია საგამომცემლო საქმიანობიდან და სეოკ-ის ემბლემის გამოყენების ლიცენზიისაგან მიღებული შემოსავლების განაწილებაზე;
- სეოკ-ის სახელით ანხორციელებს ქმედებებს და იღებს გადაწყვეტილებებს თუ გარემოებები არ იძლევა შესაძლებლობას, რომ საკითხები ოპერატიულად იქნას გადაწყვეტილი სესიისა ან აღმასკომის მიერ;
- ამტკიცებს სეოკ-ის აპარატის საშტატო განრიგს, ორგანიზაციას უკეთებს შრომითი ხელშეკრულებების გაფორმებას, იღებს გადაწყვეტილებებს პერსონალის სამუშაოზე მიღებისა, ხელფასის ოდენობისა და გათავისუფლების შესახებ;
- აღმასკომთან შეთანხმებით იღებს გადაწყვეტილებებს სეოკ-ის ქონების აქტივების განკარგვისა და პრემიალური ფონდის დამტკიცების შესახებ;
- აღმასკომს წარუდგენს ოლიმპიური დელეგაციებისა თუ მისიის ხელმძღვანელის კანდიდატურას.
- დაინტერესებულ ორგანიზაციებთან და პირებთან ერთად განიხილავს და ამტკიცებს ოლიმპიური დელეგაციის შემადგენლობას;
- ანაწილებს ფუნქციებს ვიცე-პრეზიდენტებს, გენერალურ მდივანსა და აღმასკომის წევრებს შორის. შეხედულებისამებრ შეუძლია თავისი უფლებამოსილება გადასცეს პირველ ვიცე-პრეზიდენტს ან აღმასკომის სხვა წევრს.

### **7. პირველი ვიცე-პრეზიდენტი**

- პრეზიდენტის არ ყოფნის შემთხვევაში დროებით ცვლის მას და ასრულებს მის ფუნქციებს;
- **კოორდინაციას უწევს:** სოკ-ის ოლიმპიური სოლიდარობის ეოკ-ებისთვის გათვალისწინებულ ოთხწლიანი პროგრამის განხორციელებას;
- აღმასკომის გადაწყვეტილებების შესრულებას;
- სეოკ-ის რეგიონალური ქვედანაყოფების (ფილიალების) მუშაობას;
- სეოკ-ს წარმოადგენს საერთაშორისო სპორტულ ორგანიზაციებსა და ღონისძიებებში;
- განიხილავს და წარუდგენს პრეზიდენტს თანამშრომელთა სოციალურ, დისციპლინარულ და წახალისების საკითხებს;
- ხელმძღვანელობს ოლიმპიური კომიტეტის სამუშაო გეგმის შედგენას და კონტროლს უწევს მის შესრულებას;
- პრეზიდენტთან შეთანხმებით კოორდინაციას უწევს საერთაშორისო კავშირურთიერთობების საკითხებს.

### **8. ვიცე-პრეზიდენტი:**

- სეოკ-ის პრეზიდენტის დავალებით წარმოადგენს სეოკ-ს მისი და პირველი ვიცე-პრეზიდენტის არყოფნის შემთხვევაში;
- ყოველდღიურ კოორდინაციას უწევს:
  - ა) სპორტული დირექტორატის საქმიანობას;
  - ბ) ოლიმპიური თამაშებისათვის, ევროპისა და მსოფლიოს ჩემპიონატებისათვის, ახალგაზრდული ოლიმპიური თამაშებისა თუ ოლიმპიური ფესტივალებისათვის სპორტსმენთა მზადებას;
  - გ) სპორტსმენთა და მწვრთნელთა სოციალური პირობების გაუმჯობესებისა და მათი მატერიალური წახალისების საკითხებს;

- ახორციელებს კონტროლს ვარჯიშების, სასწავლო საწვრთნელი შეკრებების და ასპარეზობების მაღალ ორგანიზაციულ და სპორტულ დონეზე ჩატარებაზე;
- კურირებს სპორტსმენთა სამედიცინო უზრუნველყოფის და ანტი-დოპინგურ საკითხებს. ამ მიმართებით აქტიურად თანამშრომლობს სპორტული მედიცინის ასოციაციასთან და ანტი-დოპინგურ სააგენტოსთან;
- მონაწილეობას იღებს სპორტული შეჯიბრებების კალენდარული გეგმის შედგენაში და კონტროლს უწევს მის შესრულებას.

### **9. ვიცე-პრეზიდენტი:**

- სეოკ-ის პრეზიდენტის დავალებით წარმოადგენს სეოკ-ს მისი და პირველი ვიცე-პრეზიდენტის არყოფნის შემთხვევაში;
- ხელმძღვანელობს ოლიმპიზმის პროპაგანდას ქვეყანაში;
- კოორდინაციას უწევს ოლიმპიური კომიტეტის ურთიერთობებს მასმედიასთან;
- ამზადებს პრესკონფერენციებს და შეხვედრებს;
- ხელმძღვანელობს ოლიმპიური კვირეულების, ოლიმპიზმისადმი მიძღვნილი ხელოვნებისა და ლიტერატურული ნამუშევრების გამოფენებისა და დეკადების მოწოდებას, ოლიმპიური დღისადმი მიძღვნილი მასობრივი გარბენების ჩატარებას;
- კოორდინაციას უწევს ოლიმპიური კომიტეტის ვებგვერდის საქმიანობას;
- ზრუნავს ოლიმპიური მუზეუმის და ბიბლიოთეკის განვითარებაზე.

### **10. გენერალური მდივანი**

- სეოკ-ის პრეზიდენტის დავალებით წარმოადგენს სეოკ-ს კონკრეტულ შემთხვევებში;
- კოორდინაციას უწევს ოლიმპიური კომიტეტის ურთიერთობებს სხვადასხვა ორგანიზაციებთან;
- აქტიურად მონაწილეობს ოლიმპიურ კომიტეტთან სხვადასხვა ორგანიზაციების მიერ დადებული ხელშეკრულებების შედგენაში, აკონტროლებს სეოკ-ის მიერ ხელშეკრულებებით აღებული ვალდებულებების შესრულებას;
- აქტიურად მონაწილეობს ოლიმპიური კომიტეტის მიერ მიღებული აქტების დადგენილებების, გადაწყვეტილებების შესრულებაში;
- პირველ ვიცე პრეზიდენტთან ერთად ამზადებს ადამსკომის სხდომებს;
- ვიცე-პრეზიდენტებთან ერთად კოორდინაციას უწევს სპორტსმენთა და მწვრთნელთა სოციალური პირობების გაუმჯობესების საკითხებს.

## **XI. სეოკ-ის დაფინანსების წყაროები**

### **1. სეოკ-ის დაფინანსების წყაროებია:**

- მიზნობრივი სახელმწიფო სუბსიდია;
- სახელმწიფო და საზოგადოებრივი ორგანიზაციების, ბანკების, ფირმების, გაერთიანებების, ფონდების, სპონსორების, საზოგადოებების, აგრეთვე ცალკეულ პირთა შემოწირულობანი, როგორც ეროვნული, ისე უცხოური ვალუტით, რომელთა მიღება სეოკ-ის მიერ მიზანშეწონილად ჩაითვადა;
- ჩუქებით ან ანდერძით მიღებული ქონება;
- საგამომცემლო საქმიანობებიდან და სეოკ-ის ემბლემის გამოყენების ლიცენზიისაგან მიღებული შემოსავალი;
- საქართველოს კანონმდებლობით ნებადართული ისეთი კომერციული საქმიანობიდან მიღებული შემოსავალი, რომელიც არ ეწინააღმდეგება ოლიმპიურ ქარტიასა და სეოკ-ის წესდებას;
- სეოკ-ისა და სხვა საერთაშორისო ორგანიზაციებიდან მიღებული დახმარებანი და გრანტები.

2. სეოკ-ის ფინანსური სახსრების განმკარგულებლად ითვლება სეოკ-ის პრეზიდენტი.
3. სეოკ-ის ფულადი სახსრებისა და ქონების მოზიდვა-შეგროვება და განკარგვა უნდა მოხდეს სეოკ-ის ღირსების დაცვით და მისი სახელმწიფოსაგან ან სხვა კომერციული ორგანიზაციისაგან დამოუკიდებლობის შენარჩუნებით.

## **XII. სეოკ-ის პასუხისმგებლობა**

1. სეოკ-ი პასუხისმგებელია საერთაშორისო ოლიმპიური კომიტეტის წინაშე საქართველოში ოლიმპიური ქარტიის იმ დებულებათა დაცვაზე, რომლებიც შეეხება ოლიმპიური სიმბოლოს, დროშის, დევიზის და ჰიმნის, სახელწოდებების “ „ოლიმპიური““ და ““ოლიმპიდა““ გამოყენებას.
2. სეოკ-ს შეუძლია თავისი საქმიანობის ფარგლებში გამოიყენოს ოლიმპიური სიმბოლო, დროშა, დევიზი და ჰიმნი, რომელიც არ არის გამიზნული შემოსავლის მისაღებად და ხელს უწყობს ოლიმპიური მოძრაობის განვითარებას მისი ღირსების დაცვით, იმ პირობით თუ ასეთ გამოყენებაზე წინასწარ არის მიღებული სოკ-ის აღმასკომის თანხმობა.

## **XIII. სეოკ-ის სიმბოლიკა**

1. აუცილებლობის შემთხვევაში სეოკ-ს შეუძლია დახმარებისათვის მიმართოს სოკ-ს ოლიმპიური დროშის, სიმბოლოს, ცეცხლისა და დევიზის დასაცავად ან მესამე მხარესთან გარკვეული სადავო საკითხის მოსაგვარებლად.
2. სეოკ-ს გააჩნია საკუთარი ემბლემა, რომლის დიზაინი დამზადებულია ოლიმპიური ქარტიის მოთხოვნათა შესაბამისად. სეოკ-ის ემბლემა დამტკიცებული უნდა იყოს სოკ-ის მიერ.
3. სეოკ-ი საქართველოს სახელმწიფო დროშასა და ჰიმნს იყენებს ოლიმპიურ თამაშებზე, კონტინენტურ თუ რეგიონალურ შეჯიბრებებზე და სოკ-ისა და სეოკ-ის ეგიდით ორგანიზებულ სხვა ღონისძიებებზე.
4. სეოკ-ს შეუძლია საკუთარი დროშისა და ჰიმნის გამოყენება თავის საქმიანობებში.

## **XIV. სიმბოლიკის გამოყენების წესი**

1. სეოკ-ი საკუთარი ემბლემის კომერციული მიზნით გამოყენებასთან დაკავშირებით სოკ-ის წინაშე კისრულობს შემდეგ ვალდებულებებს:
  - არ გამოიყენოს ემბლემა ალკოჰოლური სასმელებისა და თამბაქოს ნაწარმის რეკლამის მიზნით;
  - ნებისმიერი ტექსტი ან საგანი სოკ-ის ემბლემის გამოსახულებით დასამტკიცებლად წარუდგინოს საერთაშორისო ოლიმპიურ კომიტეტს;
  - სეოკ-ის ემბლემის გამოყენებამ ზიანი არ უნდა მიაყენოს ოლიმპიური მოძრაობის პრესტიჟს;
  - სოკ-ის მხრიდან მოთხოვნის შემთხვევაში მას უნდა წარუდგინოს მის მიერ დადებული ნებისმიერი ხელშეკრულება.

## **XV. დაგების გადაწყვეტა**

1. სპორტსა და ოლიმპიურ მოძრაობაში საქართველოსა და საერთაშორისო ასპარეზზე საქართველოს სპორტსმენების, მწვრთნელების, სპორტის მუშაკების პროფესიული

საქმიანობის პერიოდში წამოჭრილი ყველა სადავო საკითხი გადაწყდება სეოკ-ის იურიდიული კომისიის მიერ.

ადგილობრივ დონეზე მათი მოუგვარებლობის შემთხვევაში, შესაძლებელია აპელაციის სახით უშუალოდ წარედგინოს სპორტის საარბიტრაჟო სასამართლოს ლოზანაში (შვეიცარია), სადაც საკამათო საკითხი გადაიჭრება სპორტში საარბიტრაჟო კოდექსის შესაბამისად. აპელაციის ვადაა 21 დღე აპელაციის შესახებ მიღებული გადაწყვეტილების დღიდან.

## **XVI. სტრუქტურული ქვედანაყოფები**

1. სეოკ-ის რეგიონალური ქვედანაყოფის (ფილიალების) მუშაობა რეგლამენტირებულია სეოკ-ის აღმასკომის მიერ დამტკიცებული დებულებითა და სეოკ-ის რეგიონალური ქვედანაყოფების (ფილიალების) წარმომადგენელთა საბჭოს გადაწყვეტილებათა შესაბამისად.

## **XVII. განმარტებები სეოკ-ის წესდების თაობაზე**

1. საქართველოს ეოკ-ის წესდება სრულად შეესაბამება ოლიმპიურ ქარტიას და ამ დოკუმენტის უშუალო განხორციელებას წარმოადგენს.
2. სეოკ-ის წესდების თარგმნასთან დაკავშირებით რაიმე ეჭვის, ან ოლიმპიურ ქარტიასთან მისი შეუსაბამობის შემთხვევაში, პრიორიტეტი ენიჭება ოლიმპიურ ქარტიას.
3. სეოკ-ის წესდება განსახილველად და დასამტკიცებლად ეგზავნება საერთაშორისო ოლიმპიურ კომიტეტს. სეოკ-ის მიერ უკვე დამტკიცებულ წესდებაში შეტანილი ნებისმიერი შემდგომი ცვლილების შეტანისას, დოკუმენტი ხელმეორედ ეგზავნება დასამტკიცებლად საერთაშორისო ოლიმპიურ კომიტეტს.

## **XVIII. სეოკ-ის იურიდიული მისამართი**

1. საქართველოს ეროვნული ოლიმპიური კომიტეტის შტაბ-ბინა განთავსებულია საქართველოში: ქ.თბილისი 0171, დოლიძის ქ. №2.

## **XIX. სეოკ-ის ლიკვიდაცია**

1. საქართველოს ეოკ-ის სესია წყვეტს თავის საქმიანობას სეოკ-ის წევრთა არანაკლებ 2/3-ის მხარდაჭერით. სეოკ-ის ლიკვიდაციის შესახებ გადაწყვეტილების მიღების შემთხვევაში, სეოკ-ის სესია ნიშნავს სალიკვიდაციო კომიტეტს და მტკიცდება მისი მუშაობის საპროცედურო წესები.

სეოკ-ისა და მისი აღმასკომის წევრთა სახელით,

პრეზიდენტი

გ.ნაცვლიშვილი

ცვლილებები, შესწორებები და დამატებები სეოკ-ის წესდების ახალ რედაქციაში

1. გამიჯნვა სეოკ-ის წევრებსა და სესიის დელეგატებს შორის;
2. დადგინდა საანგარიშო-საარჩევნო სესიის ჩატარების განსაზღვრული ვადა;
3. მხოლოდ ფარული კენჭისყრა;
4. არ იყო დადგენილი პრეზიდენტობის ვადა;
5. აღმასკომის რაოდენობრივი შემადგენლობის შესახებ;
6. გუნდის წარმოდგენა;
7. პირველი ვიცე-პრეზიდენტის, ვიცე-პრეზიდენტებისა და გენერალური მდივნის ფუნქციების განსაზღვრა;
8. პრეზიდენტობის კანდიდატად ვისი დასახელება შეიძლება და რომელი ასაკიდან;
9. სეოკ-ის წევრი ორგანიზაციების განსაზღვრა;
10. სეოკ-ის საპატიო წევრების სტატუსის განსაზღვრა.